

國朝耆獻類徵初編卷百八十五目錄

疆臣三十七

荆道乾

畢沅

謝啟昆

陳奉茲

陳用敷

農起

清獻公

畢公

歷代三十七

國傳書胤錄錄百八十五目錄

國朝耆獻類徵初編卷百八十五

通奉大夫前署江西巡撫江西布政使司布政使湘陰李桓輯
疆臣三十七

荆道乾

荆道乾山西臨晉人乾隆二十四年舉人大挑知縣三十一年籤
發湖南四十二年補麻陽縣尋調善化縣四十七年遷甘肅甯夏
同知五十四年擢安徽池州府知府六十年擢登萊青道嘉慶二
年擢山東按察使四年擢江蘇布政使五月疏言驛站額需夫馬
工料向係各州縣將地丁銀兩解赴藩司移貯臬庫州縣復差人
支領輾轉糜費請照吏役工食例於地丁內扣支得 旨如所請

行七月 諭曰宜興奏革除漕弊一摺所指浮收勒索及折色分肥等弊朕聞之已久實爲漕務之害但所指情弊尙有不止於此者著傳諭有漕各督撫一體查辦將以上積弊實力革除尋又諭曰宜興所奏有漕州縣旣革浮收領運弁丁自無從再有幫費見在移會漕臣將所有沿途無名雜費一槩裁革及嚴禁水手格外勒加身工各情節並著岳起荆道乾會同漕臣實力查辦岳起荆道乾操守素好均能實心任事之人務須與漕臣妥爲經理俾相沿陋習以次清釐丁力旣得寬舒兌運不致有誤而收漕積弊亦一律肅清有守有爲方爲不負委任八月擢安徽巡撫十一月奏臣前奉 諭旨清釐漕弊業經嚴禁州縣浮收並擬將耗米五

斗向以五升給丁者酌加二升俾旗丁藉資幫補奏蒙 俞允在案查旗丁用項見在雖尙浮於得項但得項有據可查至沿途浮費係由採訪而知謹一例查察分別開單奏請禁革 諭曰各省旗丁押運抵通沿途費用甚多糧道又將旗丁應領各項不行如數發給以致旗丁向州縣加增幫費而州縣遂得任意浮收積弊已非一日岳起荆道乾奉到諭旨應禁陋規自應槩行裁革見在沿途濫費既除旗丁又得增添津貼用度寬裕自不致仍前支絀不能復向州縣索費而州縣更不能藉口浮收從此漕務肅清諸弊可期盡絕著將岳起荆道乾兩次奏到清摺交部通行有漕省分將一應陋規永行禁革十一月又奏貼運屯田一項每丁派田

若干及應得租籽新僉旗丁不能了然臣見令糧道刊刻木榜令
眾丁認田收租其每船應領款項亦刊刻易知單令正身運丁請
領以杜包領欺壓之弊查屯田根據向歸衛備經管不足以昭周
密請照造一分發交各衛以備僉丁查驗之用其原冊改歸糧道
收管報 聞五年三月奏臣於督放宿靈泗三屬展賑途次接到
硃諭宿州等處總應畱心恐伏秋大汛時又增災難我君臣盡
此心力保民捍患甯濫無遺仰見 皇上軫恤窮黎刻刻痾瘝在
抱臣當卽兼程馳抵宿州次至靈泗駐廠親放畢查宿靈泗皆邵
壩下游其中原被七分災地陸續涸出可以補種雜糧惟原被八
九分災地見在水深三四尺不等無從耕種奏入 諭曰宿靈泗

三州縣原被八九分災區尙未耕種見在將屆大汛之時該處積水未消萬一水勢加長後始行賑卹未免緩不濟急著荆道乾查明戶口加恩展賑至口門合龍之日俾災民不致失所六年十月因病奏請開缺 諭曰荆道乾官聲素好自簡任封疆辦理地方公事均屬妥協今年老患病著准其解任或回山西本籍地方或卽在安省就近調理俟病痊來京另候簡用七年三月 諭曰荆道乾患病解任不能起程回籍至今尙在安省調養著王汝璧密查近日病體如何旋奏道乾於是月初三日病卒 諭曰原任安徽巡撫荆道乾外任有年清操素著自擢巡撫辦理地方事務俱能整飭去冬因病患氣喘曾降旨准令解任並准在安省調理以

冀就痊茲聞溘逝殊堪軫惜著加恩賜祭一壇所有任內降革處分均予開復伊有二子一孫俟服闋後著伯麟揀選一二人送部引見尋 賜其孫旻舉人

右 國史館本傳

荆公諱道乾字健中蒲州府臨晉人也以縣學生中乾隆二十四年山西鄉試三十一年挑發湖南爲知縣所莅麻陽龍山東安永順皆有賢蹟而在東安卻鹽商歲餽千金則俗吏以爲恆事固當受者也於是上官舉公卓異矣適丁太夫人憂服滿乃引 見仍發湖南候升復補龍山調善化前後在湖南十二年擢甯夏同知又舉卓異擢池州府知府公清介端謹與人甚和易而臨公事無

纖毫內顧之私故尤爲當世賢者所貴諸城今劉相國墉撫湖南時以謂第一良吏也大興今朱尙書珪撫安徽亦謂公第一自池州調鳳陽安慶又舉卓異擢登萊青道歷山東按察使江蘇布政使嘉慶四年秋授安徽巡撫距其去安慶時未五年也公旣習於安徽又繼朱尙書後其治相似以安民便俗爲要其有所陳奏雖其事有爲天下督撫所不欲言者公皆直達於上上亦知公之至誠也公任巡撫兩年病作請解任上令公養疾待少愈入都將處以內職然公竟以嘉慶七年三月癸酉卒於安慶年七十二卒後人哭者視其幃被如寒士喪行吏民送者莫不泣涕上聞有詔愍惜賜祭令山西巡撫俟喪終擇其子若孫送部引

見焉公曾祖諱爾極祖諱毓光考諱德志皆 贈如公官有三
兄其二先卒公夫人姚氏亦先卒其第三兄學乾常與公居官舍
晝同器食夜同室寢依依如幼稚以至於終子二澤桓澤精歸葬
公請殯爲銘鼎目睹公清修令德以謂當世達人才傑蓋多矣若
夫真樸淳至表裏如一則無以逾公故舉公行如此其吏事之常
雖有善能猶於公爲不足道也銘曰

以德爲寶以義自好其行皜皜 帝曰賢哉宜臨江淮載離載來
治以道靜煦良宥嗇悲哀法葬德人之祥眾戴曰臧歿而不忘歸
葬河汾有慕故民銘其幽墳

右墓誌銘姚鼎撰

公名道乾字健中號南谿先世自明時從山西猗氏縣遷居臨晉
公生數齡極穎慧稍長爲文力追先正不苟隨時好年二十一爲
附學生旋食餽中乾隆二十四年己卯科舉人三十一年挑選知
縣分發湖南試用署麻陽龍山兩縣事時苗匪不靖官兵所過水
陸役使民夫公覈減其數民無擾累題署東安縣鞫何孔熊爭山
毆斃李芝獄白所誣何振林冤出之衡州迺南食粵鹽粵商入楚
饋東安令千金成故事公卻之上官始重其操調永順旋膺卓薦
丁母艱歸里四十一年服闋仍發湖南署慈利縣捕治土豪高斐
秦淮佐等民以安業補龍山縣調署靖州是年州境大祲餓莩狼
籍於道公碾倉穀出糶設五廠與民期晨舉廠爲號民自赴廠買

粟胥吏無所施其弊又以粟給其癰疾無告者且請截畱長安營
兵米贍賑俟秋收解歸營兵民兩便奉檄至省治獄安鄉甲與乙
婚乙後悔以女許嫁他姓將婚甲母命甲偕其兄往奪女歸乙家
來索酒食因叫號甲母恚自縊吏以甲累母至死罪應死公得乙
悔婚狀坐乙家婦女威逼罪責免之人皆以爲當復以卓薦擢甘
肅甯夏府同知會入 覲劉相國墉稱爲第一清官中朝屬目劉
曾巡撫湖南習知公行政云署肅州石峯堡逆回抗拒官軍公從
軍書旁午中治事不廢猶修復水利資灌溉制府舉公端方謹慎
卓薦 記名擢安徽池州府知府五十四年到官革除弊規甚多
署蕪湖道江安糧道時大興朱相國珪巡撫安徽尤信任公六署

蕪湖道事權稅贏餘存公不以入己旋上大府爲賑恤費五十八年調鳳陽府知府復調安慶首府隨制府至江西公幹其冬大興朱公以卓薦保公入 覲 高宗純皇帝有聞汝作好官之 諭

記名請假省墓未抵家

簡授山東登萊青道嘉慶元年到官五月

代理山東布政司事時康方伯基田塞河豐工檄公代至省治事是冬與康公商舉計典以激濁揚清爲己任薦廉吏崔映長李如珩等而密劾其不飭者二年擢山東按察使四年二月擢江蘇布政使先是州縣官存畱俸薪儀從郵驛經費自令甲改解司庫俟奏銷後請支始則防吏侵那久之解有浮費發有短平甚至勒抵前官虧帑佐雜教官不能得俸其驛傳領於臬司不潔者或苛駁

案牘因爲饋遺郵政廢弛日甚公 陛見時奏請州縣坐支經費
依舊章在地丁項下開除以省解司請領之繁奉 旨補摺卽荷
俞允施行天下便之六月到官八月擢安徽巡撫公以清名荷
知遇不三年自監司加擢節鉞益思厲節操整頓地方積習先
是外臺州縣虧帑代任時以供帳什物鋪陳作抵積多至腐敗不
可觸手猶以重值注籍公檢察通省存貯寶數盡令斥賣償帑負
而徵其不足之數於前後任事者曰吾荷 主知不敢避嫌怨也
又言事君當念勿欺故奏牘質直無華飾雖以此得過不悔時倣
政難驟革而他省復不能盡一行罷任官有牽連久不得赴補者
始怨公求治太急矣六年赴江甯監臨鄉試歸奏請以勞疾解任

奉 硃批獎公官聲及辦理封疆公事妥協 諭令解任後或回

本籍或卽在江省就近調理全愈來京簡用十二月受代居皖城
明年三月三日以疾終於寢舍春秋七十有二臨終呼首府縣至
寢所指牀下金示之曰若視印封吾幸受 重恩積養廉數千兩
足以歸櫬營葬事諸君素愛我勿爲斂賻又呼其兄屬曰兄仁弱
勿聽此輩慫恿受賻達吾言言訖氣絕公生平儉約無姬侍服食
之好自處刻厲不冒以清名益人性友悌兄應乾御乾俱先卒與
兄學乾不離晨夕至老共牀褥教督子孫嚴不爲具產業篤念師
友嘗受業牛大令運震之門後官山東召其子爲運震表墓樹碑
親往醊奠居恆好閱書傳格言嘗言生平得力是敬讓二字沈靜

有先識故大僚某官山左時有 旨命往濟上視運道卒不往公
憂之曰事上如此何以使下又見其不救月食挾優伶出省爲使
車設燕告人曰此公不敬天不敬君禍至無日矣屬同僚慎之其
後大僚果以佞貴要敗去星衍任臬使時與公先後受代與公知
契最深及丁母艱歸公過金陵必相視執手不忍別親見公行事略
因行述爲撰次所記憶以俟錄名臣碑傳者採擇焉子澤桓澤椿
孫三人長炳縣學生早卒澤椿生次爝次烺俱澤桓生

右行狀孫星衍撰